

四庫全書

集部

欽定四庫全書

集部

清江三孔集卷八

詳校官中書_臣張經田

助教_臣常循覆勘

總校官知縣_臣楊懋珩

校對官中書_臣孫溶

謄錄監生_臣汪永泰

欽定四庫全書

清江三孔集卷七

宋 孔武仲 撰

今體詩

發潯陽

西遊不敢避殘年兄弟分攜楚水邊
浩蕩東風回草木朦朧曉色滿山川
却穿梅徑花爭落久憩郵亭日未偏
安休竟非儒者事虺隤我馬亦須鞭

至白湖驛寄四弟

江頭言別頗匆匆暮止荒陂破屋中散盡烟雲無夜雨
喚驚鳬雁有春風却思僧舍一少會坐卷香醪百盞空
薄祿牽人非得已相望秋思浩無窮

廣濟道中

犖确山坡瘦馬行年朝春色未分明薦黃猶是舊時葉
格磔稍聞新歲聲強涉遠涂非我好亦逢佳景得心平
寒威斗起終豪橫更取村醪獨自傾

又

南北驅馳不少休
人生何處足優游
去年立馬龜峯道
亦是春泉繞舍流

蘄春聽琵琶五首

銀燭交光桂釀清
親朋相見苦多情
春宵萬籟俱澄絕
初試鶻絃驟雨聲

新自潯陽江上來
雖聞此曲不悲哀
輕攏細撚俱清絕
指法何慙二善才

北踏胡霜漢馬驕千秋琴調思嬌嬈華堂夜飲燈如晝
共聽新聲不寂寥

百轉千縈住復移渾如啄木在高枝春郊極目快晴後
峭絕一聲飛去時

夜如何其夜未央山城斗轉星煌煌收琴插撥各無語
酒美不知春漏長

過巴河寄經父

當時聯蓋入東都回首推遷二紀餘此地山川終不改

浮生光景半成虛
清談劇飲夢寐隔
斷羽沉鱗音信疎
誰道豐城雙寶劍
紫煙長繞斗牛墟

黃岡道中

悠悠驅馬歷山川
石火光中又度年
狼籍冷梅初著地
玲瓏幽澗已通泉
靜思客子萬里道
那及山人一覺眠
香飯可添茶可試
回頭鄉國兩茫然

故縣遇風二首

狂風奔屋似輶車
旅枕清寒一倍加
半夜雨聲收拾盡

曉來飛雪不成花

積雨成湖客路長
春風掀攪意何狂
殘雲吹盡真天力
乞我晴明入帝鄉

關山路三首

朝來晴色頗鮮妍
最愛羣峯雪皓然
駐馬折梅看皎潔
臨流照影弄潺湲

晨朝馬匹涉崎嶇
映水梅花尚一株
旬日山川歷千里
江南雪藥已全無

馬力虺隤苦不禁僕夫流汗亦沾襟抱琴來寫非無意
愛此山高澗水深

七里驛遇葉振卿秘校南歸三首

繫馬郵亭寂寞中遠沙喬木暮號風今宵不作江南夢
賴有之人笑語同

雪霰飄燈春夜長相逢旅瑣莫悲傷朱顏綠髮輸君少
正好驅車上太行

湘水秦山此路分更持盃酒勸行人馬頭便作天涯別

好到江南看早春

題光山驛壁

跨縣連州幾疊山為君題作小潼關
江湖不得長耕釣塵土胡為屢往還
漸入長郊趨坦蕩却從平地望孱顏
何當輕騎重登險指點湓城夕照間

暖轎

垂簾為戶竹為輿千里征行似宴居
達摩無心惟穩坐倪寬已老更耽書

發加祿

白草蕭蕭漾早暉
籃輿輕穩去如飛
淮天軟暖多成雨
喜有輕寒犯客衣

至新息寄蔡州王守

熙熙樂國似登臺
北圃南亭春事催
惆悵音塵難再會
瑞香應已遶簷開

渡淮

扁舟次淮浦
利涉得春風
脫險龜鼉畔
問津桑柘中
俯

窺清奪魄回望渺吞空委注雖天力經綸是禹功縈紆
數州接浩蕩百源通世久無昏墊川今有會同冷煙猶
漠漠暖渌已融融暫得觀形勝倏然慰轉蓬

發王務二首

曉隨燈火背千家落盡疎星見遠霞一餉春聲回宿鳥
半天寒色在啼鴉臨陂弱柳猶藏葉當路殘梅已盡花
賴值時光正妍潤穩看風物到京華

春水溝塍綠漸回喧闐鳬雁作羣來新年風物動人意

薄宦驅馳豈自媒
未解驂龍追渺莽
何妨乘蹇歷崔嵬
田間亦有人間逸
門掩柴荆晝未開

治平中余始自廣西赴吏部過蔡太守丁公召至
後園觀翁樹今復至此適二十年從太守黃公
登西湖待月臺

星斗垂天月淡明
九衢歌鼓樂昇平
當時常侍傳呼處
只有荒陂鳬雁聲

發蔡州

悠悠清曉歷長陂楊柳溝
鴈驚池風色著人寒料峭
日光生野暖融怡鶴歸雲
海心空在雁度湖天力已疲
客路馳驅元不定西遊應有再來時

題上蔡驛

駐馬東門已夕陽淡雲衰草意何長
當年公子牽黃犬
此地春風吹白楊千歲只疑經旦暮
一城猶可鑒興亡
我來不獨嗟行役覽古依然為閔傷

書懷

昨寄家書道苦長南州山迥水茫茫細將驛堠從頭數
準擬今朝到故鄉

書事

路逢行客向江州勒馬荒郊為少留家事滿懷無紙寫
好將言語付蒼頭

北來煙爨苦淒涼金竈崢嶸突尾長滿篋香秔無處用
郵亭一飽待枕榔

鳳凰陂

長陂寂寞斷鴟鴞浩浩春風馬鬣斜待得春霖漆水滿
只應從此却還家

入鄆陵界

馬蹄騰踏去如流雨止車塵凝不浮驛道夷平桑柘美
人言從此屬皇州

寄張端父

與君生世共飄蓬會面荒陂寂寞中芳酒一罇留夜語
旅程千里倦春風追思薦鶚門闌舊默感跳丸歲月空

聞道東書遊帝闕
偷閒應肯訪衰翁

折縣道中二首

柳堤桃塢未怡融
浣濯新梢上淺紅
一段春光來逼眼
棗騮嘶入栢林中

紫沙隨馬細如篩
虎阜龍岡盡此馳
正望長安不回首
行人休賦灞陵詩

過紫極宮感道士卓玘遺跡因賦詩以續諸公哀

辭之後

武庫精兵接混茫，揮犀餘論意何長。
丹臺此日歸仙籍，紫極他年記道場。
暫別鬢毛渾老大，再來風月愈淒涼。
不須隕涕悲鄰笛，亦對松筠為感傷。

淮西道中

曾歷光黃嶺，百尋悲傷僕馬在。
峴嶽却思前日山行苦，未比今朝車轍深。
恐轉春風成猛雨，喜逢寒色閣輕陰。
荒陂杳杳無人語，坐擁華貂只苦吟。

暖轎二首

雙袖深籠兩脚垂
朝寒乘快速荒陂
春風浩浩無邊際
似駕烏雲過海時

淮山萬點雨晴初
日日寒帷望太虛
野濶天低今可壓
閉簾無事只看書

蔡州

亭下湖光凝不流
銀燈玉笋綴綢繆
主人今是真黃霸
民譽仍推郭細侯

太守黃公與余有舊
是日張飲于西湖翠光亭黃

公以才能屢歷事任嘗奉使京西今又來守淮
康也

憶曾醉看仙翁樹騎馬重來二十年百尺湖臺蘸春綠
月華依舊到樽前

寄信守王子明

清香一炷道家儀貝葉雲籤自誦持盡是鈴齋瀟洒趣
紅塵奔走爾為誰

年來江上苦多風匹馬關山重複重須信心閑為樂地

主人牕檻有仙峯

答元珍見贈

汴柳毵毵綠蔽河
春城旅舍數相過
一聞高論煩襟豁
更捧新詩雅貺多
清釜欲回荆玉價
蕪音難斷郢人歌
儒林志業期千古
舊事慚君話決科

和竹元珍夜雨

帝城塵土熱如湯
喜有殘宵雨送涼
旅枕夢雲縈宋玉
空階詩思感何郎
香迷舊徑煙初斷
燈倚輕寒焰不長

明日御溝應更好一番晴色弄垂楊

和竹元珍寒食次韻

羈旅看春色清明客帝鄉花開禁苑密柳嫋御溝長玉
勒無餘地鈿車有剩香塵埃不可久歸夢楚山傍

旅枕

旅枕春風底脩然一夢驚漏移清禁遠天入小牕明桂
玉梁園費山椒楚客情蕭條過百五猶有賣花聲

上巳與江梅叔遊城西

禁園靈沼釀風光恩許遊人入醉鄉
天上仙葩迷閬苑
月清風闕
瀉銀潢觴浮曲水青春暮人在瀛洲白日長
却望宜秋指歸路觚稜金碧正斜陽

和竹元珍僧舍牡丹次韻

知到東隣賞牡丹高僧防客頗艱難
鮮妍自是天花種
僻靜應無俗眼看葉似蟠桃相隱覆
藥隨飛蝶漸凋殘
新詩清苦如郊島肯羨侯家一醉歡

送鄭無欲改官知合江縣二首

曉闌未央宮千袍擁赭紅分班百寮底得邑萬山中麗
筆元搞錦新章更綰銅定應隨驛召不久滯巴東

又

馬踏榆陰出漢關邦人欣見錦衣還東川却指舊遊處
北闕猶縈旅夢間神女斷雲低楚峽子規啼月慘巴山
知君利刃曾磨試圖圖應從到日閒

呈竹元珍

一室蕭然傍禁城塵埃不到旅懷清水流紅片知花落

雨浥蒼苔見筍生感物已憐春寂寞辭家憶是歲崢嶸
知君亦有淹留歎歸夢西隨杜宇聲

榴花分題

得開字

東京石榴好幾處照樓臺秀色裙難學幽香蝶不來連
枝成幄幕著子盡瓊瑰乞取當牕種年年四季開

經父云自到京止得一書頗懷憂想因寄

萬事崢嶸不自由年來書信最綢繆鴈飛玉塞無多地
人望神都正倚樓祇恐邊風多浩蕩故令音驛每遲留

何如款段相隨出鄉曲長為馬少遊

同賦京塵

京字為韻

白日臨黃道紅塵滿玉京長風吹不盡驟雨灑還清不
放虛空快應同世界生隨時勢用壯度隙體能輕舞榭
凝添恨歌梁墮趁聲滄浪歸有計行矣濯吾纓

同賦虎幘

堂字為韻

何事斑然虎來依靜者堂英姿猶讐物畫手必殊常快
筆揮如雨新纈洗似霜淺山迎暮黯叢葦得秋黃炳煥

霞紋縛晶熒鏡目光前趨疑搏取却顧尚摧藏仙子休
騎去將軍莫射傷相隨千里客更欲卷還鄉

贈程瓌

識盡公卿更食貧蒼髯瘦骨走京塵高談亦與時多忤
屢中方知術有神前會渺茫渾不記遠游蕭索復相親
疑公別得壺中趣回首人間二十春

筠州張氏追遠堂

慘淡佳城側穹隆百尺堂歲時如過隙松柏已成行玉

金
卷七
筍登盤美瓊醅入奠香英靈似明月時到此山傍

同賦蚊

得涼字

生長雖微細翾飛逐盛陽吾身非鐵石爾甯太銛剛戢
戢朝藏壁喧喧暮滿房燈前已環繞簷角尚悠揚紗眼
能綠過冰膚亦噬傷用心均貨殖損物亞螟蝗栖宿麼
蟲巧追擒蝙蝠忙秋風動天地爾輩更淒涼

同賦李夢符酒斗

天字為韻

酒斗公家物規摹取自然無時挹香酎有象掛高天綠

玉燒為撒黃金打作船何如學嘉量深注瓦樽前

留別真戒講師

假山砌疊真相似雙竹澆培畫不如萬屋塵囂無間斷
一軒氣象自清虛持齋欲趁龍華會升座能繙貝葉書
官罷亦將辭北闕攜筇先訪故人居

次韻和歐勉甫見送

抱關委吏可忘年而況吾徒志聖賢策馬漸隨南去鴈
寄聲應有北歸船無情尺水猶能鑒有志精金尚可鑄

願以此心推一邑他時不負贈行篇

題報慈寺花藥園

少時隨衆蹂京塵曾倚朱欄看晚春
二十年間頭半白方知花木解磨人

勝師堂雙竹

累石為峯太謹嚴故排雙竹闢修纖
天風似亦喜清淨時娒枝梢為埽簷

驟雨

驟雨隨風入漢關
傾都驩喜破愁顏
電光猶恐龍潛伏
閃爍餘輝遶壁間

出京

整頓歸裝夜不眠
籃輿出趁早涼天
東南爽氣來相逼
葉底初聞一片蟬

早食鐵佛寺

破壁題名滿往還
如置郵山河萬里道
車馬片時休白
日初騰曉涼蟬已喚
秋便添山野興咫尺帝王州

寄林次中

曉踏朱仙月還思昨日詩尚攜漫刺謁不與故人期宮
闕觚稜失山河向背移悠悠芳草路恰似別家時

鄆陵界中

古縣居人少歸軒喜氣多連天皆秫黍蓋水有蓮荷宿
雨雲容薄微風日氣和征行不辭遠所得是吟哦

侯塘渡

空山宿雨漲前溪芳草連雲欲渡時落日人心急星火

招招舟子更來遲

田間

百頃陂田過雨清新秋漠漠似苔生津梁只欲憑忠信
南去無心問耦耕

羅港

八節灘頭駐馬蹄淙淙流水日沉西歲時久已成陳迹
風景全然似此溪蘭棹倚洲人競過藍輿索筆我閒題
桃源仙境今何在懊惱嬌鶯向暮啼

遇行人

我託南車去君挈北轡還相看一夢裏好入畫圖間

晚行

客子念家意遠行投驛心亂鴉爭噪晚宿鳥已歸林漸
覺殘陽盡更憂前港深雲師頗知足久久困狂霖

過淮

積雨雖收霽清淮更渺茫地形真水府波面似錢塘雲
日侵衣淡天風入袖涼輕輿過南岸轉覺近家鄉

關山五首

曉上春風第一楂
豁然披眼盡天涯
原田極望人稀少
掩映茅簷數十家

又

嶺盡還臨水溪窮
又有山人遊明鏡
裏鳥語白雲間

又

少婦織新絲人來
不下機斜陽過茅
屋郎亦採樵歸

又

北地樵蘇寸草空不如燒炭此山中良材合抱隨斤斧
豈顧區區櫟與楓

又

山溪百轉水泠泠栽挿新秧次第成風趕綠茸無斷處
他時粒粒是香秔

萬松亭

治平中縣令張毅植松萬株以庇行路

鬱鬱青山夾路松行人笑語綠陰中排雲架壑無餘地
洒面侵襟有好風一日勞心非欲速千年流惠亦何窮

我來俯仰尋遺愛更喜清虛萬慮空

聽蟬

畏日流金不斷聲松風澗水助泠泠
我來蕭散無餘事得倚籃輿細細聽

過馬鞍山

足歷黃州百疊山更無平地只岡巒
物皆枯槁非人世石最崔嵬是馬鞍
畏日流金紅艷艷亂沙堆雪白漫漫
崎嶇出盡聊休息喜有松聲六月寒

喜至亭

在廣濟縣石龍坡

嶺路蟠蟠石似龍
亭軒更高峯九江
山水吾家近
四祖煙霞晚色濃
吟興不惟誇美景
行人當為破愁容
前村有酒青帘遠
強飲岩間水一鍾

陶子駿侯老堂

不逐漁商不問農
悠然今作鹿皮翁
地臨白傅荒臺畔
人在華胥樂國中
一榻遠分廬阜月
兩軒平揖廣寒風
杖藜亦欲頻還往
肯使清閒併屬公

謁張文思於湖西不見

綠竹陰深屋數間
籃輿來傍古溪邊
垂楊芳草迷三徑
斜日新秋媚一川
澎湃直連湓口浪
逍遙如泛剡中船
山陰不見戴安道
回首西風亦浩然

君表自西林還城中以詩二首為別

天上優游侍從臣
還鄉畫錦坐生春
不矜富貴知餘事
同訪溪山有故人
方外笑談無畛域
雨餘泉石長精神
西林路口嗟輕別
善護青雲萬里身

巉巉廬阜秀侵天有意登臨已十年美味君纔嘗一臠
明珠我欲採重淵他時白首須歸隱此去青雲更著鞭
扶杖為公尋好處往來同逕得叅禪

入山三首

冠蓋成陰中路迴獨攜蓮社道人來千巖萬壑初相識
分付晴嵐面面開

路出西林興倍長輕衫短蓋入秋陽層崖蔽日多清影
深谷迷人有異香訪古不辭穿絕磴參禪直為遍諸方

此身似是遼東鶴偶逐飛雲到故鄉

十歲不出還可嗟經旬遍走梵王家羣仙拍手向人笑
方朔今來何晚耶

山間三首

江城八月苦炎暉瀟洒山間挾纈時峯頂寶林俱勝絕
籃輿從此上天池

絕壁藤蘿喜可攀更無平地只青山路回亦有虛明處
江北江南指掌間

柔條細葉謾成叢亦有懸崖出小紅欲試金丹求不死
靈苗應在此山中

峯頂

苦霰悲風作斧斤千秋松竹損精神似聞犬吠白雲外
猶有秦時避世人

錦繡谷

江城已月芳菲盡殘紫深緋到谷中最是廬山佳麗處
我來蕭颯已秋風

帝憶廬山萬玉妃
狂風浩蕩喚春歸
繁華過眼一朝盡
惟有珍禽無數飛

歸宗寺

海會寮中畧問禪
高僧剛道語難傳
却詢耶舍羅那事
俯仰人間七百年

自歸宗入靈溪觀

紫霄峯下有禪林
瓦結青瑤地布金
聞道靈溪纔咫尺
攜筇不覺後山深

石橋橫路水濺濺百尺琳宮館列仙聞有秦人來避世
至今修竹上參天

瀑布六首

懸崖傾注自成川六月溪風為肅然不是化工移用巧
尾閭應亦有窮年

山頭飛瀑海中潮此理誰能問沕寥祗恐分流從月窟
桂香無限到西橋

泉上有巖桂花芳香襲人

晴天如練雨成雷飛洒青空亦快哉推倒西峯一百丈

試觀河漢所從來

沉浮又似綴汀鷗石齒橫斜咽復流莫放陰雲遮洞府
最宜明月挂高秋

接石為槽遶畫簷清風爽氣坐來添恰從天外為飛瀑
又向人間作水簾

窈窕東注壑舒徐南入江寄聲滄海若高潔此難雙

玉淵亭龍潭

清潭千古照懸崖崖上飛流動地來咫尺語言聞不得

夕陽佳景更徘徊

晚坐三峽橋

雨施雷音動十方
檀那奔走助津梁
泉舂石竇千秋白
風掃松橋六月涼
潑潑小魚生處樂
濺濺餘瀨靜中忙
塵襟正欲留瀟灑
坐聽清音到夕陽

雜題二首

青青蠹蠹水縈回
散入溪田媚復哀
天上清音難碎記
茲遊悔不負琴來

曲澗低泉左右鳴
步虛宮殿響琚珩
清風杳不知來處
散入松間作鳳笙

至新息寄四弟

江上分飛已隔年
春風初轉月初圓
今宵相望長淮北
只有星河共一天

送殷父弟知衡州

浮雲富貴本無情
出守衡陽地望清
隴畝良田多樂歲
江山秀氣入重城
鈴齋宴衍茶罇佚
棠蔭優游獄訟平

應念區區大梁客朝衣顛倒趁雞鳴

清江三孔集卷七

欽定四庫全書

清江三孔集卷八

宋 孔武仲 撰

今體詩

李公擇山房

碧落仙官侍玉除至今遺迹在匡廬當時兄弟俱年少

他日歸榮比二疏

李公讀書于廬山時年十六

松篁入路水濺濺自是廬山小洞天盡道秀才心好靜

誰知風骨是真仙

陳翰林遊天池約相會于栖買久之不至

廬阜西頭是謫仙
籃輿正欲上青天
霓旌羽蓋何時返
悵望洪崖阻拍肩

寄南康徐大夫

山南泉石有餘清
幾日籃輿天上行
亦欲西園伴飛蓋
龐公不慣入州城

白鶴觀

洞天人遠矣琳館有遺蹤願棄人間事優游慕赤松

慧日寺

山外歸來酒半酣衣襟翠色貯煙嵐泉聲自是小三峽
林色可名東萬衫

江面深沉帶地流清風爽氣入層樓倚欄却認登浮玉
平看滄溟萬里秋

答李景文見寄

金沙會面慰飄蓬況得連朝笑語同縱飲不知明月墮



納涼尤愛小軒東
郵亭送別淒涼後
江郭凭欄悵望中
兩幅新詩尤俊邁
冷然醒我以清風

維那觀師以偈示余求詩為贈因成兩絕句

擾擾長途策馬回
柴門寂寞晝慵開
清香一炷茶一啜
賴有高人數往來

夾路長松綠蔭繁
送君從此入幽關
銅餅錫杖無拘繫
正好窺尋瀑水源

師將遊廬山

黃州夜泊聽水聲因為絕句以廣歐陽公詩話

冷然非徵亦非商夜久清音入夢長
人道官蛙成鼓吹
我知風水是霓裳

黃州

客路深秋一轉蓬
淮天牢落此將窮
城開雲水蒼茫處
人在茅簷掩映中
對岸武昌風月近
千年赤壁是非空
悠悠陳迹慵開口
謾把筠竿伴釣翁

又

山上泉聲風雨來
門前峯色畫屏開
仙居洞裏桃花古

不是劉郎去後栽

吳章嶺作

廬山北轉是吳章
岩草紛紛靜有香
洞口流泉似相送
人間天上莫相忘

送僧惠芝歸東林

東林開士解談禪
共住千岩萬壑前
回首歸雲不知處
林間相遇是何年

成化縣二首

化成真化出絕險起朱欄直下臨無處江城一掬看

又

登覽多清興衣襟有白雲松風不知際仙籟坐中聞

五老峯

峻疊起青峯森然五老翁雲將色共古天與壽無窮
兀巔崖峭駢羅面勢雄三光同孕育四岳是兒童傑立
層霄際曾經壞劫中夢齡應可錫圖寫獻堯宮

次韻答李子約見贈

江縣山奇水亦清古今賢宰繼聲名施為豈厭地閒僻
學行久推君老成桂籍掇科論世契錦囊留句荷交情
當年入洛多英俊文彩誰如陸士衡

晚登庾樓

却從江漢望江廬湓口風波日愈疎滿甕尚留桑落酒
登盤今有武昌魚斜陽柳色明碕岸纖月波光濕太虛
鸚鵡洲前弔豪士重將詞賦為君書

順風發江夏

西江風浪夜喧飀清曉猶聞萬籟哀水驛正隨衡鴈去
雲帆初學海鵬開山橫別浦跳丸度席對長瀾陣馬來
快意須防太豪橫斜陽荒港少徘徊

嘉魚界中作

楚澤秋窮未有霜飄然如鴈去隨陽連空積藹湖天闊
極目無人水國荒破浪不須論萬里佩蘭聊欲寄三湘
駝裘更作春暉暖贏得曹騰晝夢長

巴陵界中作

曲曲秋江灩灩波直疑乘興到銀河逢人欲問支機石
此去星橋路幾多

又

一別湖湘二十秋飄然羈旅復萍浮冰霜入鬢殊非壯
星斗羅胸却似愁濁酒放歌朝拊髀青燈苦學夜懸頭
惟應此樂無窮已滾滾滄波盡即休

留贈上官常用

河梁欲上手重攜冷語南湖百尺隄看即青雲開羽翼

莫羞黃綬走塵泥文章炳蔚元擒鳳銚刃縱橫暫割雞
欲識長官清淨意高堂雙宇揭曹溪

蘇子瞻雪堂

古縣東邊仄徑開先生曾此劖蒿萊鸞凰一去應不返
花柳當年皆自我畫壁蒼茫留水墨朱欄剝落長莓苔
鄰翁笑我來何暮檢點風煙興盡回

罾魚

野色星輝半有無曲江舟子夜罾魚紅鱗躍網無錢買

惆悵天涯尺素書

陽羅磯

石壯山嶸不可干
傾江波浪作驚湍
殘霞一抹吳天晚
正苦扁舟不上灘

寓目

清灣氣象暮潭潭
漁客車曾似引帆
三尺鯉魚投密網
西江雖廣爾何堪

西江

灩灩西江水朝朝伴我行雲天初散豁秋色正分明魚
逝應相得鷗來故不驚煙波聊寄適南北久忘情

鄂州

綠柳陰陰蔽武昌汀洲如畫引帆檣一江見底自秋色
千里無風正夕陽暫別勝遊渾老大追思前事只淒涼
賢豪况有遺蹤在欲買溪山作漫郎

巴陵官舍二題

瀟灑堂

旅平凹處剪荆榛
畫棟明牕學隱身
政簡琴書聊度日
地閒花木為留春
一盃濁酒迷今古
五字清吟泣鬼神
暫伴登臨對佳景
衣襟渾覺減埃塵

湖山亭

縣山峻絕有新亭
公退時來看洞庭
天外微茫二湖合
波心縹緲一峯青
非時爽氣生雲雨
永夜寒光浸斗星
千古登臨增健筆
投文猶可弔湘靈

五鼓乘風過洞庭
湖日高已至廟下
作詩三篇

半掩船篷天淡明飛帆已背岳陽城飄然一葉乘空度
卧聽銀潢瀉月聲

北風投曉漸雄豪椎鼓車帆十丈高枕底洞庭三百里
卧聽天樂響叢嘈

南津灤潏夜風微投曉湖靈更發機想像虛空聞帝樂
逡巡波浪匝天圍三湘路指平蕪轉兩舸帆爭白鳥飛
却上叢祠薦牲酒荆雲隱隱尚朝暉

何君表留大舟于潯陽下敢乘既至湘陰寄絕句

謝之

洞庭秋水接天流萬斛樓航不易收才力似君方稱副
此身只合載漁舟

將至巴陵

當次江夏

南行應不歎途窮水驛連翩遇好風遠浪飛來千白鷺
輕帆相逐兩冥鴻殘雲日挂蒼茫外平野天垂曠濶中
湘浦舊遊思一訪肯因尊膾憶江東

入湘江二絕句

清川曲岸進遲遲採得菊花三兩枝
撚弄秋香斜日下有懷江國去年時

平沙襯水竹藏雲自古多招薄命人
我獨遠來追所好是中魚美綠醅醇

寄四舍弟

贛水南邊北勢回層城中起鬱孤臺
憶初二陸同登此喜有阿連相繼來
舊事前遊休感歎清風佳景且徘徊
天涯未有從闕日百里區區亦象雷

縣圃有小城環之北面有邱阜聳出喬木蔽其上
蓋古戰棚也到縣之三月得荒徑攀援而上視
其形勢可以為亭北望平野乃增築之度為四
楹公事之隙休息其間

堆案盈庭勢未休灰心聊此作天遊剪除榛莽成幽徑
支架茅簷接古丘葉密風多能庇暑雲開山出更宜秋
西園日涉從今始誰信民官得自由

城上亭二首

更無人跡逐攀躋廬岳烏藤手自攜
滄海誰論六月息茂林今得一枝栖
幽芳滿徑春難老翠樾連雲日易西
況有北郊宜曠望公餘聊此發醞雞

湘潭之酒今稍薄粉白水清亦不惡
百錢換得一斗歸復此悠然縱杯酌
醉中衡華皆秋毫肯復刺眼事錐刀
層林密葉風力豪釣天震響春臺高

登城

應俗雖勞甚登高即曠然日濃花覆地
春靜草連天竹

塢連山遠湖光帶郭偏
斯官本閒佚吾政愧烹鮮

城上喬木

城上蒼虬困不醒
春陽已半未回青
只應一夜新雷震
漸放繁枝擁日星

西園獨步

茂林新幄翠重重
猶有殘花掩映紅
庭館漸虛容散涉
時攀園果作狙公

又

官居何以滌冥煩
喜有廳西北
涉園白日漸長
公事少
紅英已盡
葉陰繁
淥波似鏡
池能照巧舌如簧
鳥解言
風景只隨人意
好昔賢何事厭湘沅

逍遙亭獨遊

城上飛簷出百尋
回環古木自成陰
涼生白晝收團扇
影入斜陽剪碎金
茂密却遮西望眼
逍遙未有北歸心
淵明盛說家園趣
誰信吾園趣更深

縣齋偶書

金史四庫全書 卷八
誤思為邑楚江潯黽勉初疑力不任吏事妄窺如管豹
歸心難過是籠禽低回未遂箕山志慷慨猶希梁甫吟
案牘埽空庭院靜只將趺坐當鳴琴

輶車館

野濶天長入望青眼中虛豁到鴻冥偶從楚俗來同樂
下視湘江笑獨醒風緊水光時蹙練日斜山影半迴屏
扁舟過此方年少老矣重來鬢漸星

次韻和楊公濟見贈三首

號畧先生不諱窮詠歌堯舜與時逢傳呼滿道今為使
欽板登門亦見容南浦清波輝玉樹西齋新釀入金鍾
臨分警戒言尤切似欲驅馳叔夜慵

魯國鯽生與俗同何嘗孤許慕龍逢邑佳不及陶彭澤
官小差肩邴曼容故國安栖無一瓦高堂失養感千鍾
賢豪見顧何恢廓自寫新詩慰病慵

清談衮衮思無窮渾似饒陽邑下逢霜重湖天初凜冽
夜長樽酒更從容新編自富詩千首巖邑今饒畝一鍾

兀坐江城隨五斗肯憂紫闕

衣幘

韓公祠堂

曾持金節撫淮壖磊落英姿正少年
萬里風鴻看振翼一時毫素冠凌煙
新祠更慰舟人望遺像仍從幕客傳
精爽威容俱不泯今騎箕尾在青天

送十二兄還江西

匣有青萍笥有書西風隻影渡江湖
剌收岳麓春前景寫入新詩勝畫圖

湘潭二首

祿仕飄然寄楚鄉，才能苦短志方強。
已栽綠柳如彭澤，況有黃金似櫟陽。
風颭湘波天影動，雲來衡岳雨聲長。
尚疑卑濕難安處，更起西邊百尺堂。

湘潭近有告發金坑者，余作堂于廳

西謂之月堂

縣街重複俯驚湍，正與湘江咫尺間。
侵齧最憂東澗水，蔽遮惟有北來山。
清流倒影樓臺壯，白瓦連雲市井閒。
捍患持危功不小，亭亭千古鎮荒灣。

縣西七里有唐興山，聳出江上，水趨

欽定四庫全書

清江三才集
卷八

南岸故邑

居得完

九月十四日小會

帶露葵花貯漆盤
周遭仍簇小雞冠
人生愛賞無時足
但作姚黃魏紫看

寄范清老二絕

高平處士節尤孤
門掩江邊徑欲蕪
詩好未窺新歲集
酒醇猶憶去年壺

一別潯陽已隔年
官居應接謾紛然
南來瀑水傾江海

夢挈塵肝先洗滌

九月廿二日西館雨中作

西館蕭然擁罽裘
渾無桃李似潘侯
路多綠竹遮欄雨
池有殘荷掩映秋
蠻獠謳歌逢樂歲
江湖風景憶扁舟
衣冠到底為身累
祇慕逍遙寄一丘

晚興

吏退公門靜蕭然
似宴居秋聲來簟枕
晚色被庭除
仄徑窺栖鳥
荒池聽躍魚
黃花惱陶令
搔首賦歸歎

寶豐倉秋納三首

次竹編蓬學缺垣中門以外蟻回旋羣呼直欲爭風疾
快走渾疑踏地穿朱墨亂揮雲落手塵氛橫集雪侵顛
新年幸有民輸樂心口相期更勉旃

彩籌森列羽門兵衮衮招呼不斷聲歲計自當平斗角
年豐今況有坻京爭先雜沓人何冗應物逍遙我自清
白日漸斜亭廡靜却臨湘水笑塵纓

縣濶人饒稼秋成衆樂租精粗驗丹白億萬起錨鉅足

趺誰先到尻高或妄呼何當寄軍令供億黑山隅

寄范清老

日挂西南有薄輝稜稜霜氣犯寒衣不愁斗柄隨春轉
祇怕梅花學雪飛湘浦波光頻送別湓城山色屢思歸
高人只在南坡住好共留錢買釣磯

湘上二首

滿眼青湘浸綠苔誰家籬援圻寒梅天容婉美霜雲薄
已逗春光入望來

南歸曾泛碧湘船
擊伏臨流似浩然
平野幾枯殘
歲草淥波猶浸舊
時天
簿書倥偬嗟巖邑
樽酒歡娛憶少年
尺水片雲今我有
亦當風月為留連

寄劉貢甫

秀水先生今傑才
崎嶇山徑滯蓬萊
飛牋岳麓吟秋草
把酒襄陽醉臈梅
東郡政聲無豈弟
南樓風月且徘徊
朝廷選用多英俊
早晚劉郎即到來

梅徑

一徑皎無塵濃酥點爛銀園池晴後雪風景臘中春採
蜜蜂時背偷香蝶命屯都將瀟洒格分付與詩人

自寶豐倉歸

岳雲成凍把春寒十里崎嶇倦往還馬上朔風回繫帶
雪中微酒見開顏含黃欲坼江邊柳蘸綠相重水上山
拋掉一官如糞壤好隨魚舸此中間

與同寮遊甘泉苦竹二寺

兩寺藏山曲登臨恨阻修平時極目處今日探春遊苦

竹經霜老甘泉帶雪流醇醪煖肌骨歸路卸輕裘

與陳董二君相會于真州經月甚樂詩寄陳董二

君兼感存沒

平生交友半成塵想見當年樂會文別淚茫茫添海水
愁懷黯黯塞江雲青衫脫去誰同老白首追隨尚有君
官暇更將碁子學他時籌局當功勲

讀王逢原文奇其才擇甚精錄一編

人喜相知自昔然况君埋玉未多年雄文一讀千行淚

青眼相期萬古傳已掇條枚收美實更披沙石貯清泉
東齋倒掩無人語火煖燈明手自編

詩答李時發見賀書省除命渠雲嘗言矣

傾蓋相期自有人贈言先許出埃塵若非清議曾推輓
安得公朝有選掄州縣徒勞雖已壓置郵傳命或非真
期公莫算人間事共醉湘江爛漫春

次韻和張芸老阻風見寄

聞道征帆却滯留蕭條湘岸正南頭春光雖有將歸意

野色仍供不盡愁
破浪心期元萬里
揚帆目送已千舟
山齋亦欲君重訪
逆水如今是順流

送劉明復知鳳翔二首

舊國安黃霸
新邦識細侯
皇慈借鄉便
輿誦欲公留
曉雪驪駒宴
春風畫鷁舟
皇都朝謁早
天路看鳴騶

又

先帝開三省
今皇重老成
山林招隱逸
巷陌起公卿
自古時難遇
吾侯道正行
岐山莫望鳳
金閣遲飛鳴

落日

光彩沉沉萬木西
青空圍出釀燕脂
家園正對荒陂望
恰似騰波出海時

次韻和鄧慎思謝劉明復畫道林秋景

鈴齋清話未更端
一掃禪林景趣完
縹緲已裝新殿塔
縈紆仍引外峯巒
冷風有意生空濶
密雪無聲下廣寒
平昔所遊今在眼
淒涼疑是夢中看

以詩博畫雖不費
要秋得冬如未完
恍疑霰雪滿天地

慘若暮氣迷峯巒夜堂高張醉魂醒暑館偶窺吟魄寒
筆端直與造化會莫作人間毫素看

留題徐成之和軒

生人情誼貴和光俸薄官閒寄楚鄉雜遘賓朋四方會
優游風月一軒涼盃傾琥珀催人飲羹煖駝蹄勸客嘗
景趣已佳心未愜更栽花竹滿池塘

寄題丁子厚二亭

睦亭

撫族無如睦開亭意可知庭階盡蘭玉兄弟即墳簞食
有分甘樂歌諧伐木詩歡心已如此風景況相宜

朋來亭

學有青衿聚亭當綠野開山川二湖曲賓友四方來鄉
行求如禹師門欲望回無輕十室小長養即高才

次韻和鄧憤思與太守同登清湘樓

郡樓邀會樂豐年極目山川思浩然才子登臨嗟昔別
使君藩屏值新遷前峯綠霧藏丹葉別浦平沙襯碧連

不但醉吟湘與麓魯歌崧漢美周宣

余嘗謂北人不知江湖如南人不習邊塞時張芸

老在坐中因問

張子胸中瑩不疑江湖邊地總曾知波瀾沃日漾舟起
霰雪埋空出塞時挂席何妨拾明月據鞍仍解賦新詩
悠然無復拘南北陣馬風檣取次宜

次韻和王敏仲望祝融峯四首

獨立千秋渾不倚排虛直上似無根履穿尚恐高難及

磴滑猶應險可捫

斗柄崢嶸宜有概
星榆爛漫豈無根
祝融直上應窺見
闔闔雖重亦可捫

南帝尊嚴勅六丁
剡湘為硯嶽為屏
照青疊秀俱來會
惟有中峯在杳冥

僧居曉看一峯青
迥絕纖塵點畫屏
會有片雲來觸石
江湖三日雨冥冥

思南嶽呈運判承議

曾逐籃輿訪嬾殘樓臺縈轉在峯巒銀燈夜向猊床拜
別殿晨披貝葉看選勝危梯經截巢登高餘思凭欄干
歸來認是游仙夢過盡春風料峭寒

和李時發春日見寄

聞道重湖路未通悠然身在碧湘中崎嶇水國猶千里
牢落春花已半空江浪濺寒侵小睡岳雲篩雨響疎篷
君詩亦說清幽趣便覺年來氣味同

湘西

文園春晚病無聊，剩欲登臨散鬱陶。
遠野輸涼來宴坐，長岡傾秀入詩毫。
輕明物態歸仙境，咫尺城闌限海濤。
勝事滿前難記憶，戲逢香草綴離騷。

留題毛成叔持月軒

明月來時遠騰騰，碧海東雲收萬里。
外人在一軒中光，泫池塘路涼生枕簟風。
相過喜良夜，莫放酒尊空。

贈長沙僧守節

花木重重鹿苑春，蕭然一室坐安貧。
真乘但要心知處，

喜捨無如樂濟人增損諸方精古義窺尋六脈妙通神
長沙旅泊無聊賴詩乞刀圭養病身

次韻鄧慎思見寄

暫寄瀟湘百尺船誰論竈冷哭無煙城陰潦積朝慵出
枕底波鳴夜廢眠潭府更看花似錦洞庭將泛水如天
相期盡校蓬山藏不祇東流酌酒仙


湘中阻風

夜泊湖南岸曉開天北風愁雲來覆渚白浪起吞空壑

酒霞將薄瓶花錦帶紅鄰舟如隔海孤坐寂寥中

二湘

斯文常絕息二子振波瀾舊國清風在荒阡古木殘蒼苔生闕宇斜日下長竿求福今無數不將陳蔡看



清江三孔集卷八

欽定四庫全書

集部

清江三孔集卷十九

詳校官中書_臣張經田

助教_臣常循覆勘

總校官知縣_臣楊懋珩

校對官中書_臣孫溶

謄錄監生_臣汪承泰

欽定四庫全書

清江三孔集卷九

宋 孔武仲 撰

今體詩

登湘陰北寺江亭

古縣我新剎孤亭占上頭
野苔侵坐綠江水帶天流
絲斷湘靈瑟墳荒帝子洲
人寰真是夢頃刻已千秋

辭三妃廟

盤空烏鵲噪叢祠
船上行人半起時
殘月朦朧傾島嶼
南風嫋嫋透旌旗
開帆便欲日千里
別廟仍澆酒一卮
岸芷洲蘭俱可薦
新聲翻入九歌詞

過洞庭二首

朝來四境宿雲披
漸放扁舟入渺瀰
漠漠衣襟凌水霧
悠悠簾幕挂天絲
波平自喜看書穩
風軟翻愁出險遲
今夜君山興不淺
登臨應及月明時

杳杳湖天極目中
波光日暮兩陶鎔
舟離廟步灣環水

帆指東山縹緲峯昔日南征期飲馬今朝北去想騎龍
歸來若得醉鄉隱願化春醪萬頃醲

自君山還岳陽

雲山深處望瀟湘巖石沈沈已夕陽却整舟帆凌浩渺
回看城郭似家鄉揮戈徑欲迴羲馭散髮今知出呂梁
不是浮休動歸興對眠猶可借禪牀

是日浮休居士張芸老欲速歸遂乘

晚北
渡

登涵暉亭

常時洲島隔波瀾故覓君山直上看罨畫園林春減色
水晶宮闕晝添寒州城斜引羣峯小湖面平吞數澤寬
坐久西風響喬木扁舟思到武陵灘

藤杖贈張從道

羣木蔚蒼蒼烏藤壽最長一朝隨翦伐千里任持將扣
觸如金石摧殘耐雪霜崎嶇伴蠟屐閒暇倚巖牆我亦
筋骸乏君方步履強臨岐輒分贈縞紵莫相忘

入萬家園

行盡東南郡重來訪舊居此心能有止他境更誰如入
徑看生筍臨池想躍魚仍貪田舍樂植杖勸芸鋤

太一宮

江城南畔碧連峯疇昔貞人寄此中琳宇邃深靈迹在
仙壇牢落杏花空池塘自老琴高鯉巖谷仍回禦寇風
共羨碧虛官職好誰知陰有濟民功

紫極宮默軒

宴坐寂不語先生心謂何逍遙疎世味恬淡養天和一

息忘言後方知得象多壺中藏日月鼎裏煮山河

泛清溪入齊山

轉轎南隄大阻長不知乘興泛輕航園林蔭翳清如簟
禽鳥將迎語有簑溪是明河天上去山疑方丈石中藏
衣巾散適心閒暇更勝登臨逐杜郎

又三絕句

風定南溪映碧虛扁舟選勝百蟠紆荇花荷葉明人眼
猶記當年入鏡湖

咫尺齊山不易登，力驅煩冗得身輕。
瑤巔珉洞須尋遍，從此乘風上玉京。

舊遊蕭索十年餘，走遍東南雪滿鬚。
醉洒銀鈎題歲月，窺尋猶在壁間無。

登齊山

路出南隄思洒然，烏藤點點破苔圓。
山腰仄塞元無路，洞底虛無別有天。
六月清風醒客醉，千叢怪石伴僧禪。
近人登覽方為貴，從此匡廬不直錢。

九華山

扁舟重過九青蓮極目空明思浩然可是畫工煩刻畫
只因山骨偶枝駢風高迥認龍騰海雲散初疑劍插天
剩採太湖嵌孔石南窓排列佇飛仙

王文玉出清溪圖以示坐客

舟在此溪濱披圖看愈親須知堂上客便是畫中人瀟
洒蒼葭映春容碧浪春秀山旁發派秋浦淨為鄰飛鷺
來窺影遊魚可數鱗飲闌須卷去聊以辟京塵

翠微亭

蠟屐縈紆洞府間，飛甍仍在最高巔。
青山東去餘無地，黃潦西來正接天。
太子池塘烟漫漫，紫微蹤跡草芊芊。
松闕枯朽由來事，莫作常情歎逝川。

銅陵縣端午日寄兄弟

寄經父

柳浦移舟帶雨行，奔波南北是平生。
忽驚佳節臨端午，還記當年客禁城。
丹杏飢盤深簇火，碧醪傾盞釀堆餚。

菖蒲角粽俱如舊何事樽前醉不成

寄季毅

南北飄然各轉蓬佳辰無路笑言同
銅壺縣冷更微雨
白鵲樓高來遠風
粽剥雪膚明席上
酒傾玉骨映盃中
區區羈旅無歡笑
遙想華堂屢一烘

清涼寺

白寺荒灣畧艤舟
攜筇來作上方遊
何年巧匠開山骨
自古精兵聚石頭
故壘無人空向久
高堂問話凜生秋

雲庵快望窮千里一借澄江洗客憂

白雲菴

青山為路竹為門千里江風到此軒誰把吳王歌管地
一時分付給孤園

石城祠

門外雲潮去復迴山頭宮殿鏤蒼苔清風明月無興廢
白鷺烏鴉自往來百戰英雄俱戲劇淒然空起子山哀

瓜步解舟

日落怒號息扁舟從此移巨鱗初脫鼎勁翮不黏羈歷
歷前征路茫茫北去陂白沙聊繫泊燈火夜深時

至樟樹店寄徐安道

逼仄東南路連天紫翠峯微雲還掩日小雨正催農谷
鳥投枝急山花落澗濃意巖今不遠談笑喜相逢

次韻和知郡朝奉登禪月臺書事二首

物有賤而貴關公收樺皮自能全烈火何用熱香脂山
徑狂風夜茅簷密雪時金蓮猝難買唯此頗相宜

素月寒光好高齋夜已扃影難穿密紙光稍泛疎櫺皎
潔臨書案朦朧到研屏沈吟憶丹桂更欲步中庭

風鐸

瀟洒當簷鐸淒清不斷風高堂人語後廣殿月明中暫
歇還歸靜重來復滿空羣仙鳴玉佩初下廣寒宮

明妃

碧落千萬里輕雲何處來仙衣行縹緲海鶴去徘徊映
日低秦嶺隨風過楚臺茅簷看不足更欲上崔嵬

讀經父所作高承制銘因寄之

征路杳無窮山川掩映中
記程知遠近分境識西東
倦客似浮梗輕鞍如去鴻
平生慣相遇轉愧坐禪翁

雜詩四首

春風仰屋卧田廬
海日鮮明柳影疎
夢覺不知身處所
此中依約是華胥

平日扁舟千里行
竭來無地濯塵纓
朝衣趁曉東華路
喜有官橋流水聲

霞冠鶴氅一道士夢半留丹三四粒云是月華宮裏人
掌心微帶銀波濕

利綰名驅夜廢眠王城車馬日喧闐誰知坦腹春風裏
醉卧牆陰不計年

酒壚西牆畫一醉仙去地尺而卧不
近糞洩似胃中曠然能忘世俗之榮

辱者故感
而賦云

早朝遇執政於路

紅燭轉沙堤天門仗未齊槐陰勒馬待月在御溝西

曉過州橋

曉日蒼涼宿霧東蓬萊金碧起浮空
滄溟萬里排天去人物紛紛海市中

祇廟祈晴

叢祠齋澣夜焚香解帶投眠小簟涼
雲色倚秋猶縹緲雨聲羞曉故摧藏

陳用之學士挽詞二首

禮學康成後朝廷復有人詩書奏旒宸
軌物錫朱銀氣象生臺閣光華動搢紳
幽途應不憾朋友自沾巾

小疾謂可起斯人今到亡溪山迷故國妻子寄他鄉館
閣應留像朝廷為給喪榮華雖不滿尚勝賈司倉

詩送應子發之官吳興

又向吳興去江湖風雪天萊衣歸戲綵儉幕看依蓮
伉直不隨世低徊今有年誰將華陰土一為拭龍泉

曹家巷稅居三詠

小椿

渺小牆陰數尺栽兒童欲拔幾徘徊須知造化機關敏

坐見童童羽扇開

小槐

合抱庭槐已是奇
何年春色長孫枝
主張莫使隨薪槨
會見繁柯偃蓋時

小井

團團樣學天邊月
汨汨聲迴地底泉
剩貯黃金還屋稅
此功寧止見山錢

送祠部劉儀文知穎州

厭逐京師車馬塵
乞為林下水邊人
江湖入夢歸心壯
道路生輝使節新
豈弟宜民推善政
清閒無訟稱天真
如聞此府多遷擢
剩醉西湖爛漫春

板橋辭太母靈輦三首

吉仗凶儀備古今
哀歌仍雜管簫音
喧闐四海脩同軌
未滿君王孝養心

元夕三宮綵仗隨
月華燈彩近瑤池
連昌故老曾經見

似夢如醒恍自疑

元夕陳儀衛
明日發引

鬱鬱陵臺瑞氣多
短簫聲裂想悲歌
西郊淚盡身先返
唯有心隨洛水波

宋履中學士挽詞二首

朝論方知子哀哉
疾不瘳歌聞湘浦些
魂返岱宗遊文雅
承三世淵源見九流
音容如可接圖像
在瀛洲

跡忝詞場舊官俱瀛府
仙過從常永日推予更忘年
素業期三友幽途隔九泉
春明書史富貴與弟兄賢

和四弟夏雨

蠶月雨冥冥愁雲滿太清
庭階猶積潤溝港更繁聲
嫩綠應浮野餘涼稍及城
隋河今不淺放艇欲南征

之官宣城贈毅父次其韻

幾夕林聲醞造秋移船回
指鳳凰樓身疲禁內凝嚴
地恩與江南爽塏州歷數
近城多異境問知前政盡
名流嘉觀勝賞應難盡更
為吟哦萬古愁

除宣城守贈元忠毅父次其韻

垂楊正好移舟看輕舸何
妨出沐遲疊嶂雙溪雖未
歷

白雲芳草已相知

送文潛出守丹陽

山陽驚坐早軒軒元祐登瀛正少年殿上仍簪侍臣筆
江頭新艤使君船吟哦氣爽滄溟外曲步心期白日邊
守得東南知不負夢中應作五洲仙

寶應界中絕句三首

倒景虞淵日餘威澤國霞宵行逐明月水宿傍人家
泉水秋浮艇荒陂暮聽蟬登瀛從此路出守已衰年

淮天秋日下水國晚涼中舟子趨程意軒軒欲貫虹

明月亭下作

杳杳蕪城起暮鐘亭亭華月照秋容便疑碧海依牆塹
雲水情知隔萬重

繫舟長蘆作

夜泊長蘆星滿川晚來吳楚氣昏然雲雷相會還成雨
江海交流獨艤船廢室與人喧白浪荒村何處起青烟
文書滿眼從拋棄却倚蒲團學坐禪

長蘆五絕句

吳楚中間天杳茫，愁霖傾卷水洋洋。
千帆渡口低鵬翼，海濶風微不敢翔。

扁舟昨出國門東，煩暑端如坐甑中。
一雨一涼皆可喜，只嗔三日打頭風。

白霧應連滄海東，鄰舟相失渺茫中。
時時客子江頭語，社過應須有好風。

波聲滾滾百川流，七日津亭厭艤舟。
遙望叢祠燒的乳，

美風相遣莫淹留

去盡江灣伴侶船
整帆徐出浦沙邊
風濤沃日心彌壯
老矣無因似昔年

諸葛武侯

天下軍書動西南
霸氣偏太公謀國
妙伊尹佐時專季
漢基還立強吳勢
外連兵從新節制
志復舊山川霜肅
關中晚春浮渭上
天恩威人並附將
相器俱全醜虜羞
巾幗遺音被管絃
妖星如不墮功業
管蕭前

宣州吳子權送陵陽酒

夢寐陵陽天上山，曾將心約白雲閒。
仙銜已下青冥裏，塵骨難留縹緲間。
三尺溪魚如可控，千年遼鶴尚應還。
多情別後能論舊，遠寄官醪為解顏。

宮詞二首

十頃西池碧近天，春深調馬教龍船。
至尊勤政歡嬉少，企望鑾輿又七年。

雲霧猊香錦繡堆，千官重列序賓儀。
欲知湛露零蕭處，

盡在天杯側勸時

池州山

水際天邊盡畫屏
廣寒宮闕玉為城
南來已為江山助
到此逢山眼更明

三山磯

磯下長川欲倒流
江豚出沒水禽浮
憑誰為告詩仙道
今到青天盡處遊

彭澤山

山磯環合闢鯨虯白水如湯動地流崖崿盡成斤斧迹
當年誰與化工謀

發彭澤

御風南去覺泠然今日無慙禦寇仙廬嶽奇峰將出地
豐城寶氣已連天詩書未敢當謀帥忠信由來可涉川
止仗江神扶羽翮解帆江浦夕陽邊

橙子

秋露凝漿細朝陽入色深冰壑不須搗恐碎裏蹄金

將至湖口作

一帆安穩轉汀洲
吞吐波瀾畫鷁遒
三尺龍文光景動
川平何處有蛟虯

次韻馬巾玉春日偶成

京都久客憶歸頻
準擬江南看早春
多病餘生萬事已
起驚芳意一番新
東湖水滿魚應樂
南浦波明柳自勻
玉臉芙蓉容易得
要須叮囑養花人

草石寺

寺有潘閭題壁
權德輿晏坐記

高士去已久餘蹤猶可知竹陰侵晏坐山影在平池塵
蝕參軍墨苔侵相國碑漫尋瀟洒趣俯仰愜心期

太霞宮

有二道士
善鼓琴

誰氏夸豪力琳宮一手開光輝動金碧瀟洒絕塵埃煮
石洞中火流霞天上杯籃輿穿翠樾只為聽琴來

送李端叔定州機宜

十二月
十七日

才高祗合住蓬瀛步武優游地望清何事塵埃久京國
却衝雨雪向邊城軍書落筆千毫禿談席揮犀四座傾

早晚封章來薦鶚一鳴從此使人驚

癸酉臘雪

十二月十九日

又見同雲合朝來雪滿天寒生梁苑席興在越溪船不
復風鳴屋應須澤到泉農家相慶喜處處畝鍾田

惜竹并引

東齋有竹數竿翠蔚可喜其旁衆筍附生寢益深茂
最後出者尤若奇特無不應意解籜未盡而為老兵
手折之悲夫以干雲蔽日之勢而摧於窓戶之下以

凌霜冒雪之姿而失於俄頃之間環步往來悽愴良久不能忘情既而自譬解以為陰陽之化育天地所覆載孰非假妄自四肢百骸外至耳目所接諸物若器皿若室屋親愛之聚輿馬之隨孰能固守而終全之其會合出於暫然至於離散壞熄此理終在何獨一竹可傷而介然於懷乎乃頗能自遣而宥役兵之罪然復一到其下則初心還起不能平也余真大惑者歟抑物之難得而可愛當然者也始置其說寓之

以詩

老蘚牆陰夕照間
何人折我翠琅玕
卽茲綠葉隨塵化
猶有低枝帶露殘
不放雲梢侵霰雪
因嗟世故足波瀾
故園未乏簣簞品
十頃繁陰六月寒

贈夢符朝議

玉溪在夢符宅後

人笑公衣不浣濯
我憚公心霜雪明
青山仕宦有真氣
白首鄉閭無惡聲
相逢回首又再歲
暫去還來觀太平
何事南歸太果決
蕭然遠作玉溪生

駕自宣光殿還內

直午開金闕中天動玉輿千官星拱極萬乘斗回車瑞
氣春妍後清風雨霽初鳴鞭嚮寥廓彩仗正蘇舒古禮
觀瞻始皇情酌獻餘書林俊遊盛拜舞爛袍魚

景靈宮奉安神考御容

先帝遺弓劍威靈在九州方悲風馭遠已見月衣遊別
殿笙歌動中天彩翠浮觚稜參魏闕氣象擬蓬丘羽衛
生幢蓋都人識冕旒吾君孝心遠文考百無憂

題山光樓

山靜園平野樓高映碧空
人居仙島曲天入畫屏中
倚檻雲蟾近傾觴客興同
扁舟期一到須借五湖風

芍藥

樓上看紅藥都城值晚春
風葩低永晝露臉泣芳晨
憶昨淮南客曾為詩社人
輕明是樓子閒澹有天真
此地雖都會茲花莫等倫
維揚不復夢羸馬禁城塵

大風

萬竅軒軒漸怒號坐來渾怕屋山搖洞庭曾聽咸池樂
吳會飽聞滄海潮此地風聲真似殘春人意正無聊
雲師又洒天街雨明日千官好上朝

洪福寺藤架

生長應毫末敷腴忽十尋繁花春不歇密葉晝長陰
風過龍蛇動雲開洞府深時來學晏坐朝市不關心

讀梁武帝紀二首

破除綱紀事虛空可恨蕭家一老翁魚爛土崩俱自取

不須候景到江東

鉏決隄防縱怒濤橫流四海盡滔滔單于已入朝陽殿
軟語空疑定力高

楸花

淡薄已無俗秋高真出羣
莪莪揭翠藻漫漫綴紅雲
遠色天街盡餘香省戶聞
狂風曉來劇惆悵落紛紛

送望聖監南獄廟

還鄉同赴紫宸朝笑語從容慰寂寥
白髮侵凌今滿鑑

青春羈旅舊連鑣
易江小隱西園在
湘浦新除道路遙
老境不堪論契濶
東風官柳亂隄橋

景靈宮殿多植茶藤清香遠聞

宮殿沈沈鏤碧雲
仙葩相倚正敷芬
珠簾翠幄知多少
不礙清香處處聞

送韓密學知定州

聞說公家閱古堂
于今出守似還鄉
營開細柳旌旗動
山假臙脂首菊長
北府貔貅瞻玉節
南樓風月寄胡牀

親朋出祖無惆悵早晚韓侯對未央

遊凝祥池同晁無咎作

平時念京國此地愜幽情楊柳繁無路鳬鷺遠有聲郊
原斜日下襟袂好風生把酒須拌醉還家不隔城

送郊公甫通判睦州

又向東南去都門奈若何塵埃京洛久山水富春多宴
俎誇魚美書帷待雁過鵬程休暫息九萬看騰波

遊洪福寺

清晨戒童僕馬匹出皇州欲探逍遙趣因成爛漫遊
藤蘿回晝暝雲雨送春愁傍近緋桃塢尋春亦少留

睡椅

非馬亦非船可坐兼可眠客來呼不應睡美腹便便
書慵食飽後還作定中禪

次無咎凝祥春遊三首

芸編校罷得嬉遊池館雖春爽似秋同舍病郎追不及
喜傳佳句到瀛洲

浴日池光初炯炯三春禽語已關關
珍臺閒館波濤接太液昆明伯仲間

奉靈池館鏤幽深遺跡淒涼故老心
維嶽雲車時一下直疑絃管有來音

遊州南同文潛作

峩峩宮殿列仙居深水方圓氣象殊
萬里舟船會京洛幾人詩酒到蓬壺
日斜清弄來幽谷風定薦紅滿綠蕪
語罷恍然真夢幻不應天邑有江湖

館中桃花

蓬壺深絕鑠芳菲
初見仙桃第一枝
天近自應風景別
春長莫恨化工遲
相重朱戶人稀到
半掩香苞蝶未知
想像江南今盛發
亦經頻雨稍離披

早春

欲探年光好春風
入酒帘寒威隨雪解
芳意逐情添塞雁
今回陣冰魚稍出潛
王孫幽興動顏巷
自安恬

謁吳傳正因贈

宴坐足觀妙朝歸還閉門身居丞相第室似給孤園競
逐浮雲駛難揩古鏡昏相期荷君厚商推有清言

立春晚會呈經父

侍史新從天上歸相逢忻喜著春衣
萱芽刺土占芳節
蘭醕傾觴亂夕暉兄弟幾人華萼聚
歲時經眼羽翰飛
東風處處吹噓到從此鄉園筍蕨肥

石榴

造物巧雕鏤慙慙在石榴中妍寧暴露外穩不輕浮露

液甘凝蜜瓊房密貯秋非徒適人口飮坐亦風流

送何司封知壽州

清淮帶城郭形勝壓吳天人苦懷襄後帝求師帥賢郎
官已分竹畫鷁似登仙昨夜驚烏坐星輝共黯然

送傅正之官禮部

妙道微言早自知鈞衡何事器君遲連牆並屋相從久
聳壑昂霄此去宜畫省含香脩故事雲臺呼仗請私儀
想君清直家風在好為朝廷作伯夷

十二月朔入局

坐聽禪林叩曉鐘
官曹遙指禁城東
千門洒掃冰鏡路
萬木號呼葉受風
金殿放朝閒虎士
蟾泓揮翰冷瑤宮
春暉閉目無多日
預草新文擬送窮

送歐陽仲勉通判渭州

時天寒
歲暮

當年筆戰共詞場
老大聯袂振鷺行
薦牘北來當玉座
軺車西去擁銀章
潼關曉色雲藏市
渭曲春寒菜有霜
公退登臨多絕唱
解因風月記江鄉

清江三孔集卷九